



ORDO CONFIRMATIONIS IN PERICULO MORTIS

1 Cum tempus advenerit quo Sacerdos, utens facultate sibi ab Apostolica Sede tributa, administrare Confirmationem ægrotanti in periculo mortis constituto intendit, saltem stola, si superpelliceum habere non possit, indutus, circumstantes admoneat, quod nullus alius, nisi Episcopus, Confirmationis ordinarius Minister est; se vero collaturum esse illam iure per Sanctam Sedem delegato.

2 Dein moneat patrinum (vel matrinam), ut ponat manum suam dexteram super humerum dexterum confirmandi.

3 Stans igitur versa facie ad confirmandum, iunctis ante pectus manibus, dicit:

Ÿ. Spíritus Sanctus supervéniat in te et virtus Altíssimi custódiat te a peccátis.

℞. Amen.

4 Deinde, signans se a fronte ad pectus signo crucis, dicit:

Ÿ. Adiutórium nostrum in nómine Dómini.

℞. Qui fecit cælum et terram.

Ÿ. Dómine, exáudi oratiónem meam.

ORDO CONFIRMATIONIS IN PERICULO MORTIS 87

℞. Et clamor meus ad te véniat.

Ÿ. Dóminus vobíscum.

℞. Et cum spíritu tuo.

5 Tunc, extensis versus confirmandum manibus, dicit:

Orémus

Omnípotens sempitérne Deus, qui regeneráre dignátus es hunc fámulum tuum (hanc fámulam tuam) ex aqua et Spíritu Sancto, quique dedísti ei remissionem ómnium peccatórum: emítte in eum (eam) septifórmem Spíritum tuum Sanctum Paráclitum de cælis.

℞. Amen.

Ÿ. Spíritum sapiéntiæ et intelléctus. ℞. Amen.

Ÿ. Spíritum consílii et fortitúdinis. ℞. Amen.

Ÿ. Spíritum sciéntiæ et pietátis. ℞. Amen.

Ÿ. Adímple eum (eam) Spíritu timóris tui, et consigna eum (eam) signo Cru ✠ cis Christi, in vitam propitiátus ætérmam. Per eúndem Dóminum nostrum Iesum Christum, Filium tuum: Qui tecum vivit et regnat in unitáte eiúsdem Spíritus Sancti Deus, per ómnia sæcula sæculórum.

℞. Amen.

6 Postea Sacerdos inquirat de nomine confirmandi, et, summitate pollicis dexteræ manus Chrismate intincta, confirmat eum, dicens:

N., Signo te signo Cru ✠ cis, quod dum dicit, imposita manu dextera super caput confirmandi, producit pollice signum crucis in fronte illius, deinde prosequitur: et confirmo te Chrismate salutis. In nomine Pa ✠ tris, et Fi ✠ lii, et Spíritus ✠ Sancti.

R. Amen.

Et leviter eum in maxilla cædit, dicens:
Pax tecum.

7 Sacerdos postquam frontem confirmandi lini-
erit sacro Chrismate, eam gossypio diligenter
abstergat.

Tergit postea cum mica panis, et lavat pollicem
et manus super pelvim; deinde aquam lotionis cum
pane et gossypio in vase mundo reponat et ad
ecclesiam postea deferat, comburat, cineresque
proiciat in sacrarium.

8 Post lotionem ab ipso Sacerdote dicitur
Antiphona:

Confirma hoc, Deus, quod operátus es in nobis,
a templo sancto tuo, quod est in Ierúsalem.

V. Glória Patri, et Fílio, et Spirítui Sancto.

R. Sicut erat in principio, et nunc, et semper,
et in sácula sæculórum. Amen.

Et repetitur Antiphona: Confirma hoc, Deus,
etc.

9 Qua repetita, Sacerdos stans versus infirmum,
iunctis ante pectus manibus, dicit:

V. Osténde nobis, Dómine, misericórdiam
tuam.

R. Et salutáre tuum da nobis.

V. Dómine, exáudi oratióem meam.

R. Et clamor meus ad te véniat.

V. Dóminus vobíscum.

R. Et cum spíritu tuo.

Iunctis vero adhuc ante pectus manibus, dicit:

Orémus

Deus, qui Apóstolis tuis Sanctum dedísti
Spíritum, et per eos eorúmque successóres
céteris fidélibus tradéndum esse voluísti: réspice
propítius ad humilitátis nostræ famulátum, et
præsta; ut eius cor, cuius frontem sacro Chrismate
delinívimus, et signo sanctæ Crucis signávimus,
idem Spíritus Sanctus in eo supervéniens, templum
glóriæ suæ dignánte inhabitádo perficiat: Qui
cum Patre, et eódem Spíritu Sancto vivis et
regnas Deus, in sácula sæculórum.

R. Amen.

10 Deinde dicit:

Ecce sic benedicétur omnis homo, qui timet
Dóminum.

Et vertens se ad confirmatum, ac faciens super
eum signum crucis, dicit:

Bene ✠ dicat te Dóminus ex Sion, ut vídeas bona
Ierúsalem ómnibus diébus vitæ tuæ, et hábeas
vitam ætérnam.

R. Amen.